

svoje snažno obuhvatne organizacije i gvozdene discipline koja otuda slijedi, putem zahtjeva za uključivanje cijelokupne ličnosti, razdire postvarene koprene koje u građanskom društvu obavijaju svijest pojedinaca. To što je ovo dugotrajan proces, što tek stojimo na njegovom početku, ne smije i ne može da nas spriječi u tome da težimo da se princip koji se ovdje javlja, približavajuće »carstvo slobode« spozna u danas najvećoj mogućoj jasnoći kao zahtjev upućen klasno-svjесnom radniku. Baš zato što nastanak komunističke partije može biti samo svjesno učinjeno djelo klasno-svjесnih radnika, ovdje je svaki korak u pravcu tačne spoznaje istovremeno i korak ususret ostvarenju carstva slobode.

(S njemačkog preveo Ljubomir Tadić)

FILOZOFSKE IDEJE MLADOG GÖRGY LUKACSA O KLASNOJ SVIJESTI I KOMUNISTIČKOJ PARTIJI

Mađarski mislilac Görgy Lukács poznat je našoj kulturnoj javnosti najviše po svojim estetičkim studijama, manje (s izuzetkom knjige »Mladi Hegel«) po općim filozofskim pogledima, a veoma malo po svojim političkim idejama. Predstava o Lukácsu kao estetičaru nije pogrešna, iako izbor njegovih prijevoda na naš jezik nije bio u vijek najsretniji. Počevši od 1908. godine kada se na mađarskom pojavilo njegovo opsežno djelo »Razvitak moderne drame«, Görgy Lukács je pretežni dio svog velikog opusa posvetio problemima umjetnosti.

Ako bismo htjeli ukratko rezimirati suštinu Lukácsove filozofije, mogli bismo reći da se ona svodi na kritiku objektivizma i afirmaciju subjektivnosti u historiji. Lukácsov pristup marksizmu i komunističkoj revoluciji proističe, s jedne strane, iz njegove teorijsko-filozofske kulture, temeljito poznavanja i razumijevanja svih vodećih ideinih struja onog vremena (koje ocjenjuje ne samo kao krizu buržoaskog svjetskog poretku, već i kao ideo-lošku krizu proletarijata), a s druge strane, iz nade da je revolucionarni proletarijat jedina snaga koja može čovječanstvo izvesti iz te krize na put historijskog napretka.

Velika filozofska pitanja koja Lukács postavlja sebi u duhu njemačke filozofske tradicije jesu:

šta je historija?
koji su njeni pokretači i njeni predvodnici i
kako se ljudski napredak može pojmiti?

Lukács, dakle, odlučno insistira na kategorijama Hegelove filozofije kao konstitutivnom elementu historijskog (dijalektičkog) materijalizma. Već u predgovoru »Historiji i klasnoj svijesti« on ističe da je samospoznaja stvarnost bitna tačka vezivanja Marxa s Hegelom, naročito ukoliko Hegel povezuje stvarnost sa zbijanjem, historijom. Lukács izričito upućuje na utjecaj Hegelove »Logike« na historijski materijalizam, a naročito podvlači da je Marx usvojio Hegelovu razliku između egzistencije i stvarnosti. Kao naročitu Hegelovu zaslugu za razvoj marksističke dijalektike Lukács ističe misao o »svjetskom duhu« (Weltgeist) kao jedinstvenom subjekt-objektu, kao jedinstvu svijesti i predmeta. Po Hegelu istina znači cjelinu, biti u stvarima, ne odnositi se prema predmetima kao prema nečem tuđem. Historija nije samo prošlost, već i sadašnjost i budućnost. Sadašnjost upravo treba shvatiti kao postanak u kome sami učestvujemo da bi bila naša, moja sadašnjost. Istina nije, ona postaje.

Njemačka klasična filozofija je, smatra Lukács, otkrila suštinu ovih pojava, postavila probleme, ali ih nije uspjela riješiti. Historijski materijalizam počinje tamo gdje je ona stala, a stala je s Hegelom. Jer tačka vezivanja s Hegelovom filozofijom kao samospoznajom stvarnosti istovremeno je i tačka razilaženja marksizma s hegeljanstvom. Lukács ispravno smatra da Hegel nije izvršio svoj postavljeni zadatak jer nije zbilja pre-

vladao dualizam subjekta i objekta, bivstva i mišljenja. U odlučnoj tački on nije prevazišao Kanta i Fichtea koje je inače s pravom kritizirao te se sunovratio u filozofiju refleksije i pozitivizam. Historijski materializam zato znači nastavak i daljnji razvitak ne svake već klasične, tačnije Hegelove filozofije. Klasična filozofija je zadržala mišljenje u granicama obične refleksije o datoru stvarnosti, u granicama kontemplacije. Time je očuvan tradicionalni dualizam bivstva i mišljenja, subjekta i objekta, teorije i prakse. Premda je još Fichte postavio zahtjev za praksom (ideja »Tat-handlunga«), on je proveden samo u sferi etike i to čisto formalno i besadržajno, kao regulativna ideja, trebanje, »beskonačni progres«. Velika ideja o principu kreacije, stvaranja, koju je još Kant izrazio, zakazala je u trenutku sudara s datošću, kada je iz tog principa trebalo da se stvari prvi konkretni sadržai. A upravo suština prakse, tj. slobode u smislu klasične filozofije, pokazuje se u ukidanju ravnodušnosti forme prema sadržaju.

Kod Kantovih enigona subjekt spoznaje sve se energičnije rastavlja od čovjeka, čisti se od svega antropomorfog i preobraća u čisto formalni, transcendentalni subjekt, subjekt logike. Hegelov identični subjekt—objekt (*Weltgeist*), koji je trebalo da bude subjekt historije dobio je u obliku »narodnog duha« mitološki izraz. Ali, po Lukácsu, buržoasko društvo i imanentno značenje njegovih pojmoveva predstavlja polaznu tačku metode preobražaja društva: »pogrešno« i jednostrano u buržoaskom shvaćanju historije predstavlja nužni moment u metodskoj izgradnji spoznaje društva. Za historiju i samospoznaju stvarnosti na kojoj Lukács insistira mora se naći jedan konkretni subjekt koji objedinjuje teoriju i praksu. To je proletarijat čiji je zadatak da vrati izgubljenu cjelinu. Oslanjujući se na Marxove teze Feuerbacha Lukács neće da vrši puku zamjenu idealizma materijalizmom (kao što su činili i čine svi vulgarni marksisti) već nastoji da shvati proletarijat kao subjekt historijskog procesa i (što je već problem za sebe) kao konkretiziran Hegelov svjetski duh. Klasna borba je izraz dijalektičke nužnosti, a proletarijat onaj dijalektički negativitet, agens, koji stoji na čelu historijskog procesa i samim tim predstavlja nosioca društvenog napretka u modernom društvu. On je u početku samo objekt, a njegova svijest je samo »samosvijest robe«, ali i tada je praktična jer se u svakoj robi otkriva odnos među ljudima kao faktor razvijanja društva. Proleterska klasna svijest nije svijest o jednom protustavljenom predmetu već sa samosvijest predmeta. Lukácseve analize fenomena postvarenja u kome mrtvi rad vlasti živim radom, proizvod proizvođačem, nisu samo oslonjene na Marxa već i na Maxa Webera je u duhu Marxa. On racionalizaciju kao kategoriju Weberove sociologije povezuje logično i spremno s Marxovom teorijom postvarenja u građanskom društvu.* Iz fenomena racionalizacije koja svaki radni i životni proces razlaže na njegove elemente rada se fetišizam empirijskih činjenica, matematizacija društvenih odnosa i mehaničko prenošenje prirodnih zakona na društvo. Otuda potječe svaki fatalizam i objektivizam, a čovjek se svodi na pukog promatrača zbivanja izvan njega i osuđuje na pasivnost. Zato se Lukács zalaže za kategoriju totaliteta koju smatra »nosiocem revolucionarnog principa u nauci«. Dok prirodne nauke u svom materijalu ne trpe nikakve protivrječnosti, za društvenu stvarnost ove su protivrječnosti neodvojiva suština nje same, a samim tim i dijalektičke nauke. Kategorija totaliteta ukazuje samo na realne tendencije društvenog procesa koje su pozvane da u stvarnosti, u razvitku društva ukinu te protivrječnosti. Dok je za buržoasku misao karakteristično ostajanje pri neposrednosti, za klasnu svijest proletarijata karakteristično je dijalektičko posredovanje, koje neumoljivo zahtijeva sadašnjost kao problem historije.

Ali prirodne nauke nisu samo ideal buržoaskog mišljenja već i svakog revizionizma i oportunizma koji su zarobljenici buržoaske ideologije i teorijski izraz ideološke krize proletarijata. Oportunistička politika upravo se zasniva na sitnim, neposrednim interesima čime se gubi veza sa cjelinom i principima. Ona u stvari nastaje iz odvajanja politike i privrede, krajnjeg cilja i neposrednih interesa. Oportunizam polazi od posljedica a ne od uzroka, od dijelova a ne od cjeline, od simptoma, a ne od same stvari. On mijesha psihološko, mogli bismo reći empirijsko stanje svijesti proletarijata s njegovom klasnom svješću. U radu »Intelektualci i problem inte-

* Poseban je problem da li i koliko Lukács stvarno uvida Marxovo razlikovanje između opredmećenja u postvarenju (otudjenju). Jer za Marxa postvarenost je buržoaski otudena forma opredmećenja u procesu proizvodnje, tj. u onom trenutku kada proizvodnja postaje sama sebi cilj.

lektualnog rukovođenja« Lukács je već istakao da klasna svijest proletarijata izražava samo vezu neposrednih interesa proletarijata sa zakonitostima društveong napretka. Ali da bi društvo došlo do svoje samosvijesti, potrebno je učiniti još jedan korak do samosvijesti proleterske klasne svijesti koja u napretku traži sebe i čiji je organizacioni oblik komunistička partija.

Lukácsovo učenje o partiji sadržano je pretežno u posljednjem ogledu »Istorijske i klasne svijesti« koji se ovdje objavljuje kao dokument o vremenu kada se ideja kompartije prvi put pokazivala u svom istinski revolucionarnom činu. Ovaj ogled pisan je 1922. godine, poslije Lenjinovog spisa »Dječja bolest Ijevičarstva u komunizmu«, prvih kongresa Kominterne i znamenite diskusije o sindikatima. On je sav prožet nastojanjem da se organizaciono pitanje uzdigne na najviši teorijski nivo kao simbol dijalektičkog principa povezanosti teorije i prakse, ideje i realnosti. Zato je partija, po Lukácsu, posrednik između teorije i prakse, konkretni princip posredovanja između čovjeka i historije. Ona je ona velika zajednička vodilja koja izražava opće interese cijelog proletarijata i koja se ostvaruje samosvjesnom disciplinom (kao jedinstvom slobode i solidarnosti) i unošenjem cjelokupne ličnosti svakog člana u njenu akciju i borbu. Ona je »pri svjeti korak u susret carstvu slobode«, nosilac etike u klasnoj borbi proletarijata. Na taj način, Lukács filozofski interpretira stavove Rose Luxemburg i Lenjina o organizacionom pitanju, ali ostaje na Lenjinovoj strani u sporu s Rosom Luxemburg kojoj zamjera što nije uspjela razviti svoje prvobitne ispravne poglede o organizaciji i što je ostala na tzv. »organском« shvaćanju partije. Otvoreno ostaje, međutim, pitanje da je, u nekim aspektima Lukácsova interpretacija Lenjina bila data u Hegelovom a ne u Marxovom duhu. Izgleda da je Lukács shvatio partiju — na apstraktan način — kao neku vrstu čuvara trezora historijskog materializma, a klasnu samosvijest kao zamjenu za dijalektičku nauku, i kao nosioca »apsolutnog znanja«. Daljnja, važna primjedba koja se Lukácsu može uputiti je njegovo shvaćanje individualne slobode kao buržoaske kategorije, ili, tačnije izvjesno nekritično miješanje egoizma s individualnošću. Lukácsu se također može zamjeriti što je sveobuhvatni pojam ljudske prakse (možda pod uticajem historijskog trenutka) u mnogo čemu reducirao na političku praksu itd.

Usprkos svemu način na koji je njegovo djelo tako reći sinhronizirano odbačeno u radničkom pokretu i od Kominterne i od socijaldemokrata (zajedno s pokušajima Karla Korscha, Fogarasija i Révaia) pokazao je, na žalost isuvise jasno, da sljedbenici Marxa i Lenjina nisu imali mnogo smisla za dijalektiku, te se na taj način Lukácsova prognoza o ideoološkoj krizi proletarijata potpuno ispunila. Jer, iako se Lukács odrekao ovog svog djela (isuvise striktno shvaćanje discipline?) problemi koje je on postavio ostali su do danas živi i vrše, kako je rekao prevodilac francuskog izdanja, i danas »podzemni utjecaji«. Jer, ako i nije riješio mnoge probleme Lukács ih je postavio na jednu duhovnu visinu kakvoj, naročito u uslovima sadašnje krize, treba da stremi svaki iskreni marksist i komunist.

Lj. T.